

SODALI MEO  
M. I. JACKSON

HARVM LITTERARVM CONTEMPTORI

*Signa pruinosaë uariantia luce cauernas  
noctis et extincto lumina nata die  
solo rure uagi lateque tacentibus aruis  
surgere nos una uidimus oceano.  
uidimus: illa prius, cum luce carebat uterque,  
uiderat in latium prona poeta mare,  
seque memor terra mortalem matre creatum  
intulit aeternis carmina sideribus,  
clara nimis post se genitis exempla daturus  
ne quis forte deis fidere uellet homo.  
nam supero sacrata polo complexaque mundum  
sunt tamen indignam carmina passa luem,  
et licet ad nostras enarint naufraga terras  
scriptoris nomen uix tenuere sui.  
non ego mortalem uexantia sidera sortem  
aeternosue tui sollicitare deos,  
sed cito casurae tactus uirtutis amore  
humana uolui quaerere nomen ope,  
uirque uirum legi fortemque breuemque sodalem  
qui titulus libro uellet inesse meo.  
o uicture meis dicam periturene chartis,  
nomine sed certe uiuere digne tuo,  
haec tibi ad auroram surgentia signa secuto  
hesperia trado munera missa plaga.  
en cape: nos populo uenit inlatura perempto  
ossa solo quae det dissoluenda dies  
fataque sortitas non immortalia mentes  
et non aeterni uincla sodalicii.*